

SCRIPT OF EVENING GOJRI NEWS BULLETIN 08APR 2026  
1700HRS

اوننگ گوجری نیوز بولیٹن 08 اپریل 2026

\*\*\*\*\*

یوہ آکاشوانی جموں بے نصرت چوہدری تے ظفر اقبال تیں خبر سُنو۔

\*\*\*\*\*

HEADLINES

- ۱۔ لیفٹیننٹ گورنر منوج سنہا نے اج دو سرکاری ملازماں نانہہ دہشت گرد تنظیمیں تیں تعلق غا الزام مانہہ نوکری تیں کڈ دتو ہے۔
- ۲۔ وزیر اعلیٰ عمر عبداللہ نے جموں کشمیر مانہہ ثقافتی ورثہ تے سیاحت نانہہ فروغ دین واسطے ایک اعلیٰ سطحی میٹنگ غی صدارت کی جس مانہہ تاریخی مقامات غی حفاظت تے اُن گا بہتر استعمال ور گل بات کی گئی تانجے سیاحت نانہہ بڑھاوو دتو جاسکے۔
- ۳۔ وزیر اعلیٰ عمر عبداللہ نے اج جموں گا کنونشن مرکز مانہہ 3 روزہ صوبائی سطح گا بیداری پروگرام غو افتتاح کیو اس قدم غو مقصد عوام نانہہ اہم سماجی تے ترقیاتی مسائل بارے آگاہ کرنو تھو۔
- ۴۔ جموں کشمیر غا نوجوانان غا ایک وفد نے اج صدر جمہوریہ محترمہ دروپدی مرمو تیں راشٹرپتی بھون مانہہ ملاقات کی۔ یوہ وفد، وطن نانہہ جانو، پروگرام غے تحت دہلی غا دورہ ور ہیں۔
- ۵۔ جموں کشمیر غا اج کئی علاقان مانہہ نمایاں بارش درج کی گئی، راجوری ضلع مانہہ سب تیں زیادہ بارش ہوئی ہے۔ تے جموں سرینگر قومی شاہراہ 44 ور پسی پین تیں شاہراہ نانہہ آمدرفت واسطے بند رکھیو گیو ہے۔ رستہ نانہہ صاف کرن غو، کم جاری ہے۔

\*\*\*\*\*

LG EMPLOYEES SACKED

لیفٹیننٹ گورنر منوج سنہا نے اج دو سرکاری ملازماں نانہہ دہشت گرد تنظیمیں لشکر طیبہ تے حزب المجاہدین تیں تعلق غا الزام مانہہ نوکری تیں کڈ دتو ہے۔ آکاشوانی جموں گا نمائندہ غے مطابق، کڈیا گیا ملازماں وچوں ایک گو ناں فرحت اعلیٰ خانڈے جہڑو رام بن غا محکمہ تعلیم غو ملازم تھو اُس ور یوہ الزام ہے کہ وی حزب المجاہدین واسطے کم کرے تھو تے دہشت گردی غا رابطہ نانہہ دوپارہ فعال کرن مانہہ مدد دے تھو تے دہشت گردان غا خاندانان نانہہ پیسہ فراہم کرے تھو۔ دوجو ملزم محمد شفقی ڈار جہڑو بانڈی پورہ مانہہ محکمہ دیہی ترقی مانہہ کم کرے تھو، اُس ور الزام تھو کہ اس نے لشکر طیبہ نانہہ سہولت تے پناہ فراہم کی۔ اس نانہہ اپریل 2025 مانہہ ہتھیاراں تے گولہ بارود غے نال گرفتار کیو گیو تھو۔ یاہ کاروانی حکومت غی ناقابل برداشت پالیسی غے تحت کی گئی تانجے کوئی وی ملک مخالف عنصر سرکاری نظام مانہہ کم نہ کرسکے۔

\*\*\*\*\*

CM HERITAGE MEETING

وزیر اعلیٰ عمر عبداللہ نے جموں کشمیر مانہہ ثقافتی ورثہ تے سیاحت نانہہ فروغ دین واسطے ایک اعلیٰ سطحی میٹنگ غی صدارت کی۔ اس میٹنگ مانہہ تاریخی مقامات

غی حفاظت تے اُن گا بہتر استعمال ور گل بات کی گئی تانجے سیاحت نانہہ  
 بڑھاوو دتو جاسکے۔ سماجی میڈیا ور ایک پوسٹ مانہہ وزیر اعلیٰ نے کہیو کہ  
 اپنی ثقافتی شناخت نانہہ محفوظ رکھنو بہت ضروری ہے۔ اُنہاں نے زور دینا واں  
 کہیو کہ ثقافتی سیاحتی رستہ تیار کیا جیں تانجے متہ تے متہ سیاح آویں تے  
 جموں کشمیر غی خوبصورت تاریخ نانہہ دیکھیں اُنہاں نے کہیو اس طرح جموں  
 کشمیر ملک مانہہ ایک اہم ثقافتی سیاحتی مقام بن سکے۔

\*\*\*\*\*

## CM CEASEFIRE RXN

وزیر اعلیٰ عمر عبداللہ نے اج امریکہ تے ایران غے بشکار حالیہ جنگ بندی غا  
 اعلان ور اپنا خیالات غو اظہار کیو۔ اُنہاں نے سوال چایو کہ امریکہ تے اسرائیل غی  
 جانب تیں ایران غے خلاف ناجائز جنگ کرن غی وجہ کیا تھی۔ جد کہ اس جنگ  
 بندی تیں بعد اُنہاں بارموز دوبارہ تیں کھل گئیو بے جہیڑو جنگ تیں پہلاں وی سب  
 واسطے کھلو تھو۔ سماجی میڈیا ایکس ور جناب عمر عبداللہ نے اس جنگ نانہہ  
 ناجائز قرار دتو تے پوچھیو کہ اس اُنٹالی دناں غی جنگ تیں امریکہ نانہہ کے  
 حاصل ہوو ہے۔ قابل ذکر ہے کہ دواں ملکاں نے 2 ہفتہ مجوزہ جنگ بندی ور اتفاق  
 کیو ہے باشرطے کہ ایران اُنہاں بارموز غے ذریعے محفوظ رستو فراہم کرے۔

\*\*\*\*\*

## CM AWARENESS

وزیر اعلیٰ عمر عبداللہ نے اج جموں گا کنونشن مرکز مانہہ 3 روزہ صوبائی سطح گا  
 بیداری پروگرام غو افتتاح کیو محکمہ سکولی تعلیم غا زیر اہتمام اس قدم غو  
 مقصد طلبا اساتزہ تے عوام نانہہ اہم سماجی تے ترقیاتی مسائل بشمول منشیات تو  
 نجات ماحولیاتی تحفظ، ٹریفک بیدادی، تے ذہنی صحت غا پارہ مانہہ آگاہ کرنو ہے۔  
 قابل ذکر ہے جے افتتاحی تقریب نانہہ بکھ بکھ اضلاع مانہہ براہ راست نشر کیو  
 جے غو جد کہ کٹھوعہ مانہہ یاہ تقریب گورنمنٹ کالج وومنز آڈی ٹوریم مانہہ  
 منعقد ہوئی تے اس غی صدارت ضلع ترقیاتی کمشنر راجیش شرما نے کی اس  
 موقعہ ور خطاب کرتا واں اُنہاں نے اس طرح کہیو.....ضلع سانہہ مانہہ طلبا تے  
 اساتزہ ضلع انتظامیہ کمپلیکس مانہہ جمع ہوا جس مانہہ محکمہ تعلیم غا چیف  
 یشپال شرما نے کاروائی غی قیادت کی آکاشوانی غا خیراں آلا شعوبہ سنگ گل کرتا  
 واں محکمہ تعلیم غا چیف یشپال شرما نے کُج اس طرح کہیو.....

\*\*\*\*\*

## RANA MEDICAL POONCH

قبائلی امور غا وزیر جاوید احمد رانا نے اج ضلع پونچھ غا مینٹر علاقہ مانہہ 2  
 تہاڑا ور مشتمل صحت بارے علاج و معالضہ واسطے مفت طبی کیمپ گو افتتاح کیو  
 ہے۔ اجتماع سنگ خطاب کرتا واں وزیر موصوف نے اس طرح غا دور دراز تے  
 سرحدی علاقہ مانہہ صحت غی دیکھریکھ بارے اقدام چایا جان ور متعلقہ محکمہ  
 غی تعریف کی قابل ذکر ہے جے اس کیمپ مانہہ متالوکاں نے حصو لے غے دوائی  
 مشاورت تے تشخیصی سہولیات توں فائدو لیو۔ وزیر موصوف نے محروم علاقہ  
 مانہہ صحت غی دیکھ بھال غی رسائی نانہہ مضبوط بنان واسطے حکومت غا عزم  
 غو اعادو کیو۔

\*\*\*\*\*

## PREZ JK YOUTH

جموں کشمیر غا نوجوانان غا ایک وفد نے اج صدر جمہوریہ محترمہ درویدی مرمو تیں راشٹر پتی بھون مانہہ ملاقات کی۔ یوہ وفد وزارت داخلہ غا پروگرام وطن نانہہ جاتو غے تحت دہلی غا دورہ ور ہیں۔ صدر جمہوریہ نے نوجوانان نانہہ ملک غی تعمیر مانہہ حصو لین غی ترغیب دتی تے کہیو کہ وہ ملک غی ثقافت تے تنوع سیکھیں۔ انہاں نے اس پروگرام غی تعریف کی، جہیڑو نوجوانان نانہہ ملک غا بکھ بکھ حصاں تیں جوڑے۔ یوہ پروگرام قومی یکجہتی نانہہ مضبوط بنان تے نوجوانان نانہہ ملک غا بارا مانہہ بہتر سمجھ دین واسطے بنایو گیو ہے۔

\*\*\*\*\*

## CRPF TOUR

ادھمپور مانہہ واقع سی آر پی ایف غی 137 وی بتالین نے اپنا سیوک ایکشن پروگرام غے تحت گورنمنٹ ہائر سکینڈری سکول گربی غا طلبا واسطے ایک ہفتہ طویل بھارت درشن ٹور گو اہتمام کیو ہے قابل ذکر ہے جے اس ٹور مانہہ تقریباً 20 طلبا نانہہ جموں توں بنارس تک بھارت گا چقافتی تے تاریخی ورثہ نانہہ تلاش کرن واسطے روانہ کیو گیو جس مانہہ ممتاز ورثہ گا مقامات تے مقامی روایات شامل ہیں۔ اس موقع ور ایم ایل اے پون کمار گپتا ڈی آئی جی ادھمپور ریاسی رینج شیو کمار شرما تے کمانڈنٹ 137 بی این، سی آر پی ایف منوج کمار سکان وی موقع ور موجود تھا۔ آکاشوانی گا خیراں آلا شعوبہ سنگ گل کرتا واں کمانڈنٹ 137 بی این، سی آر پی ایف ادھمپور منوج کمار نے اس طرح کہیو۔

\*\*\*\*\*

## JMC TAWI FESTIVAL

جموں میونسپل کارپوریشن نے بیساکھی غا موقعہ ور توی ریور فرنٹ ور 14 توں 16 اپریل تک 3 روزہ توی مہاتسو تہوار غو اعلان کیو ہے ایک پریس کانفرنس سنگ خطاب کرتا واں جے ایم سی کمشنر دیوانش یادو نے کہیو ہے کہ اس میلہ غو اہتمام محکمہ سیاحت تے اطلاعات غے سنگ مل غے کیو جے غو قابل ذکر ہے جے اس تقریب مانہہ کشتی رانی، روایتی کشتی، مقابلو، ڈوگری کھانو، پتھر توں بنانی تے دست کاری غا سٹال ثقافتی کارکردگی تے بچاں غی سرگرمی وی شامل وین غی۔ متعلقہ کمشنر نے عوام نانہہ شرکت کرن غی دعوت دتی ہے تے کہیو جے یوہ میلو صفائی تے دریائے توی غا تحفظ نانہہ وی فروغ دے غو۔ اس سلسلہ مانہہ بولتا واں جے ایم سی گا کمشنر دیوانش یادو نے اس طرح

کہیو۔

\*\*\*\*\*

## WEATHER

جموں کشمیر مانہہ اج سویرے ساڈھ 8 بجے تک کئی علاقان مانہہ نمایاں بارش درج کی گئی راجوری ضلع مانہہ 50 ملی میٹر جموں مانہہ 42 ملی میٹر ادھمپور مانہہ 41.6 ملی میٹر تے کٹڑا مانہہ 39.8 ملی میٹر بارش ہوئی۔ محکمہ موسمیات غے مطابق، اج بیشتر مقامات ور وقفہ وقفہ سنگ ہلکی توں درمیانہ درجہ غی بارش غو امکان ہے تے موسم عام طور ور ابرآلود رے غو۔ قابل ذکر ہے جے 9 تیں 16 اپریل توڑی چند مقامات ور ہلکی بارش غی پیشین گوئی کی گئی ہے خاص طور ور سویر توں دوپہر تے شام گا وقت مانہہ، حکام نے رہائشیاں نانہہ محتاط

رہن تے موسم غی صورتحال توں باخبر رہن غو مشورو دتو ہے ۔ اس سلسلہ مانہہ بولتا واں محکمہ موسمیات غا ڈائریکٹر مُختار احمد نے کُج اس طرح کہیو.....

\*\*\*\*\*

## TRAFFIC SUSPENDED

بانہال مانہہ مَچ سارا مٹی غا تودا ٹین غی وجہ توں جموں سرینگر قومی شاہراہ 44 ور گڈیاں غی آمدرفت بند کردتی گئی ہے۔ سڑک ور ملبو بٹان تے صفائی غو کم جاری ہے ۔ تاہم حُکام نے لوکاں نانہہ تاکید کی ہے جے وے اگلی ہدایات توڑی قومی شاہراہ ور سفر نہ کریں ۔ اس سلسلہ مانہہ بولتا واں ایس ایس پی ٹریفک قومی شاہراہ راجہ عادل حمید گنئی نے کُج اس طرح کہیو.....

\*\*\*\*\*